

La lingua taliana en Svizra

Ina lavur da master a l'Universitad da Geneva

DA GUIU SOBIELA-CAANITZ


■ **L'Universitad da Geneva, segunda citad svizra segund la cifra da populaziun, posseda t. a. ina «Faculté da traduction et d'interprétation» che conceda la «Maîtrise universitaire en traduction» per l'arab, l'anglais, il franzos, russ, spagnol, talian u tudestg. Il retoromanist Anton Velleman (1875–1962), vischin d'onur da Zuoz e traductur da la Societad da las naziuns, ha fundà 1941 la Scola d'interprets da Geneva ch'è vegnida 2011 facultad universitara. Lezza ha concedi il 2015 la «maîtrise» surmenziunada a la studenta tessinaisa Elisa Pestoni per sia lavur davart il talian en Svizra*. Il cumpendi introductiv di: «La promozion dal talian en Svizra, enina lingua naziunala ed uffiziala e lingua da minoritad per 8% da la populaziun, stat amez la debatta actuala davart la plurilinguitad, (...) betg mo en il chantun Tessin, mabain er en il Grischun. Lezza lavur examinescha las mesiras instituziunals introducidas dacurt per rinforzar la posiziun dal talian en Svizra, (...) las numerusas iniziativas da pliras uniuns per defender il talian e mantegnair ses studi sco L2 en l'entir pajais.» I suonda ina recensiu che punctuescha quai ch'ins fetschia e quai ch'ins duaja trair endament per promover il talian en ils chantuns romands ed alemans.**

La situaziun oz

En sia prefaziun rapporta l'altura dal grond smirvegl d'ina classa genevrina cur ch'ella haja referi davart la Svizra italofofa: «I savevan propi fitg pauc.» Oravant tut: Quant ferma è l'italofonia en Svizra? «8,3% il 2013, (...) numnadamain 312 000 umans en la Svizra italofofa (...) e 330 000 ordaifer» (1.1.). Il chantun Tessin dumbrava 346 539 olmas il 2013. Il preambel da sia constituziun punctuescha ch'el saja «fidaivel a la missiun istorica da represchentar la cultura taliana en la confederaziun»; l'art. 1 al definescha «republica democratica da lingua e cultura taliana» (1.2.1.). Las valladas italofofas dal Grischun dumbran var 13 000 olmas; l'italofonia totala dal chantun munta var 19 000 olmas. «Pir dacurt ha il Grischun reconuschì cleramain che rumantsch e talian sajan periclitads e bagegnian protecciun» (1.2.3.). L'altura menziuna «la situaziun stabla (...) dal talian a Beiva, grazia a la scola primara che dat la prioritad a l'instrucziun per talian» (1.3.2.3.). Adina puspè chatt'ins «traducziuns plain sbagls: I paran da palesar che tscherts manaschis privats respectian pauc il terz linguatg naziunal (...)». I na dat nagina obligaziun (...) areguard la qualitat da las traducziuns en linguas naziunals (...). En il Québec, cun sia legislaziun precisa e clera, è la situaziun fitg differenta» (1.4.2.). Il 2010 muntava la populaziun cun pass talian en Svizra 16% da la populaziun estra. «Il consulat d'Italia dat curs da lingua e cultura taliana als uffants immigrads durant tut ils onns da scola; quai è essenzial per mantegnair e profundar lur savida da talian. Quai encliegan las scolas statalas; i registreschan ils resultats en ils attestats e faciliteschan la frequentaziun da lezza instrucziun cur ch'ella sa splega durant uras da scola» (1.4.3.). Er immigrads d'otra derivanza, per exempel portugaisa u spagnola, dovan savens il talian sco lingua franca, cunzunt en chantuns alemans: «Per els èsi fitg grev d'emprender tudestg pervi da la diglossia cun dialect e lingua uffiziala; (...) percenter datti medias italofofas en l'entira Svizra» (1.4.4.).

Politica linguistica federala

Il segund chapitel da la lavur è politologic: «La plurilinguitad svizra è statala (...): Il stadi reconuscha la dignitad



Il frontispizi da la lavur dad Elisa Pestoni davart il talian en Svizra.

equivalenta da tut las linguas discurdas en lur agens intschess da gruppas etnicas geograficamain separadas (...). Il territori pluriling svizzer cumpiglia regiuns monolinguas (...). Mintga lingua naziunala è francada aifer ses agen intschess tradiziunal, ma è strusch protegida legalmain ordaifer quel territori, e la competenza per l'instruir pertutga al(s) singul(s) chantun(s)» (2.1.). L'altura renviescha qua ad ina publicaziun da Sacha Zala (Berna), istoricher oriund da Brüsche e parsura da la Pro Grigioni Italiano (Pgi) en fin a 2014. Zala punctua il cuncontrast paradoxal tranter ils uffants talians a Berna, ils quals frequentavan ils curs arranschads da lur consulat, e ses agens uffants a Berna, vischins svizzers, ma senza scolaziun svizra davart la lingua naziunala ch'i dovan en famiglia. Romedi Arquint, anteriur parsura da la Lia Rumantscha, stigmatizescha «la praschunia territoriala dals linguatgs**» (v. La Quotidiana dals 11 da november 2014). Pestoni releva che l'art. 70 da la Constituziun federala «discurra expressament da mantegnair e promover rumantsch e talian, (...) pia da proteger dapli lezs linguatgs (...) smanatschads» (2.2.1.). La Svizra ha plinavant ratifitgà la Charta europeica da las linguas regiunals u minoritaras, «promova rumantsch e talian en quest senn» (2.2.2.) ed accumplescha la Cunvegna da basa per la protecciun da las minoritads naziunals a favur da sias trais cumanzas neolatinas. La delegada federala per la bilinguitad «controllescha il mantegniment e la promozion activa da la plurilinguitad» (2.2.4.). La lescha davart la publicaziun en las trais linguas uffizialas «prescriba ch'ins possa generalmain acceder a medem temp en lezzas linguas a las publicaziuns da la confederaziun» (2.2.5.). «La chanzlia federala ha plinavant in consulent per la politica da linguas» (2.2.6.). L'Uffizi federal per la cultura «prevesa da promover l'instrucziun da talian ordaifer la Svizra italofofa (...) per proteger quella pluralitad culturala che ha rinforzà la Svizra ed è il fundament da nossa coesiu naziunala» (2.2.7.). L'administra-

ziun federala «schlargia l'offerta da curs da lingua per ses persunal» (2.4.).

Accziuns per defender il talian

La terza part da la lavur è deditgada ad «insaquantas iniziativas per promover il talian en Svizra» (3.). Qua mo ils exempelils pli remartgabels: «L'Universitad della Svizzera Italiana (USI) s'engascha dapi 2012 per l'instrucziun da talian en Svizra. Ella arranscha segiurns linguistics per gimnasiastas e gimnasiasts d'auters chantuns, cun uras da talian ed instrucziun davart la cultura da la Svizra italofofa» (3.1.3.). «La Pgi è naschida il 1918 a Cuira per dar furma a la mancanza d'unitad territoriala e 'per defender ils interess da la minoritad italofofa en Svizra' (...). Ella represchenta il Grischun italofofon era tar il Cussegl da l'Europa areguard dumondas da lingua» (3.1.5.). «Il Consulat general d'Italia (...) porscha curs da lingua e cultura taliana en differentas citads svizras durant l'entir temp da scola» (3.1.7.). Dapi 2014 datti plinavant in med d'instrucziun fitg original che vul «sviluppar l'abilitad da chapir il talian, al colliod cun il franzos e per part er il tudestg, ed a medem temp infurmar davart la Svizra italofofa» (3.2.1.1.). Il manual, intitulà «Capito? Comprendre l'italiano in Svizzera», è vegni publicitg da l'Osservatorio linguistico della Svizzera italiana (OLSI, Blinzuna) cun l'agid da las universitads da Berna e Friburg. Las auturas èn Elena Maria Pandolfi, Sabine Christopher e Barbara Somenzi. L'administraziun federala dovra lez manual tar curs destinads per ses persunal. «Tut las persunas che han fatg part da quels curs manegian ch'i chapeschian ussa talian pli tgunsch» (3.2.2.1.4.).

Il rom d'instrucziun

L'altura deditgescha ses quart chapitel al talian sco rom d'instrucziun cunzunt en ils gimnasis: «Instruir las linguas naziunals en Svizra è in problem fitg actual, damai che plis chantuns han oz mustgas da favurisar l'anglais» (4.). Pestoni rapporta l'emprim davart il Gri-

schun: «Dapi l'onn da scola 1999/2000 vegn il talian instrui sco segunda lingua en las scolas primaras germanofonas grischunas, e quai davent da la terza classa (...). Il 2013 han ins pruvà da metter en dumonda lezza instrucziun cun in'iniziativa populara chantunala intitulada: 'Mo ina lingua estra en las scolas primaras' (empè da duas). L'iniziativa pretendeva oravant tut che l'anglais saja l'unica lingua estra en las scolas primaras da las regiuns germanofonas (...). Ils adversaris da l'iniziativa manegiavan percenter che lezza discrimineschia las minoritads e violeschia las leschas federalas e la Constituziun chantunala. Durant la sesida decisiva dal Cussegl grond ils 20 d'avrigl 2015 ha deputà Reto Cramer defini l'iniziativa 'in'attatga frontala cunter la trilinguitad' dal chantun. Il cussegl ha lura declerà l'iniziativa nulla cun 82 vuschs cunter 34 (...). Lezza episodada simbolica mussa che blers resguardan il talian, lingua naziunala minoritara, sco main impurtant che l'anglais, e quai schizunt en in chantun per part italofofon» (4.1.2.).

Gimnasis genevrins

«La Conferenza svizra da las directuras e dals directurs chantunals da l'educaziun publica (CDEP) ha relevà ch'ins duaja en mintga cas rinforzar l'instrucziun da talian en ils gimnasis (...). Il 2013 han mo 13% da gimnasiastas e gimnasiasts tscherni da frequentar curs da talian (...). Quai è fitg pauc per ina lingua naziunala ed uffiziala. La CDEP ha manegià ch'ella duaja formular recumandaziuns en chaussa: Quai ha'la fatg ils 26 da mars 2015 (...). En ils davos onns avevan plis chantuns u gimnasis vuli abolir ils curs da talian u almain als reducir u degradar (...) pervi dal dumber memia bass d'annunziast. L'emprim patratg pertutgava il talian sco rom da matura: Ils chantuns duajan s'engaschar 'per che mintga gimnasiast(a) possa frequentar l'instrucziun relativa' (...). Ils gimnasis che na possian betg porscher lezza instrucziun duajan chattar ina schliaziun cun auters gimnasis situads 'ad ina distanza supportabla dals domicils' (...). La segunda recumandaziun (...) stimulescha ils chantuns d'arranschar l'instrucziun da tscherts roms per talian (...). La davosa (...) vul supplittgair ils chantuns e lur gimnasis da far diever dal sustegn federal per imaginar sezs modas da promover il talian» (4.1.3.).

Per guntgir il tudestg

L'altura rapporta lura da scolas secundaras da Geneva e dal Vad: «Mintga scola secundara statala dal chantun Genevra porscha instrucziun da talian: Gimnasis, scolas da cultura generala, mercantilas e professlunals (...). Davent dal settember 2015 arranscha il departament d'instrucziun publica, cultura e sport curs da talian mintga memsena suentermezdi» (4.2.1.). Lura vegnan las nundumbraivlas pussaivladads genevrinas d'emprender talian e da sa perfecziunar: Curs dal consulat talian, da la «Società Dante Alighieri», da scolas privatas, lur il gimnasi Pareto (en il Vad) «che prepara enina al Baccalauréat franzos ed a l'Esame di stato talian» euv. Al gimnasi chantunale genevrin (quatter onns) ston ins tscherner tranter talian e tudestg avant ch'ins possa emprender anglais. «Ins s'acquista pia noziuns fundamentalas da la lingua e cultura da l'Italia e da la Svizra italofofa» (4.3.1.). Ins tschernna savens il talian perquai ch'el vala sco pli lev ch'el tudestg, tantpli sch'ins deriva d'ina famiglia italofofa u sch'ins vegn d'in pajais (Frantscha, Portugal, Spagna) nua ch'ins n'emprenda betg tudestg en la scola primara. L'altura ha supplittgair diesch docentas e docents da talian a

Genevra da far lur remartgas didacticas. «I èn bunamain unanims: Lur gimnasiastas e gimnasiasts san pauc u na san nagut da la Svizra italofofa. I collian cun la lingua taliana il pli savens mo l'Italia (...). La glieud da Geneva visita la Svizra taliana per regla mo pauc (...). In magister (...) ha rapportà ch'el haja lavurà en il chantun Friburg, nua ch'el haja observà differenzas: Ils Friburgais paran d'enconuscher meglier la Svizra italofofa» (4.3.2.5.).

In manual per in curs d'in'emna

L'«appendice D» (annexa) da la lavur è intitulà: «Italiano subito». La «Scuola universitaria professionale della Svizzera italiana» (Supsi, dfa.rec@supsi.ch) ha elavurà «in curs intensiv d'introducziun al talian per novizs absoluts che frequentan scolas secundaras en regiuns alemanas. Il patratg fundamental (...) è ch'ins possa gia promover la coesiu naziunala e precisar la noziun da quadrilinguitad svizra cun ina savida minima (...). En in'emna da lavur cun il manual 'Italiano subito' vul ins pia approssimar scolaras e scolaras a la Svizra italofofa ed als persvader ch'ella munta in element da l'identitad plurilingua dal pajais (...). I sa tracta da porscher in inscunter positiv cun il talian (...) sco emna da project u sco 'Klassenlager'». L'altura concluda pia sia lavur preschentond in med d'instrucziun cun la finamira da promover il studi dal talian a nord da las Alps. En ses terz chapitel ha'la gia analisà «Capito?», manual elavurà per gidar a chapir quella lingua naziunala: «Lez dovra la medema metoda che 'Chunsch druus?', med d'instrucziun per ils dialects alemans» (3.2.1.). La chasa editura bernaisa Schulverlag (info@schulverlag.ch) punctuescha che «Chunsch druus?» cuntogna «aktuelle Hörtexte und Alltags-Dialoge in verschiedenen Idiomen». Ins pudess pia elavurar in manual analog, intitulà per exempel «Encliegas?», che gidass a chapir il rumantsch cun texts en ils differents idioms ed en «rumantsch grischun», lingua uffiziala dal chantun Grischun e da la confederaziun. Pestoni fa endament pliras giadas ch'il rumantsch saja in linguatg smanatschà; dal rest ha'la cuntanschì fitg bain sia finamira d'analisar la situaziun multifara dal talian en Svizra. I fascheva propi bagegn da relevar cleramain ch'ins stoppia infurmar la giuventetgna davart la Svizra italofofa. Ma il talian è era la lingua d'in pajais limitrof da strusch 61 milliuns olmas ed il vehichel d'ina cultura millennara che ha influenzzà profundamain nossa. Las novitads che vegnan da l'Italia n'èn betg adina positivas; i descha dentant da far endament era tschellas. Per exempel, che la lescha taliana nr. 482, en vigor dapi ils 15 da december 1999, reconuschia e protegia las linguas, expressamain numnadas, da dudesch minoritads etnicas e lur culturas istoricas, e quai «en armonia cun ils principis francads da las organizaziuns europeicas» (art. 2). Era quai fa part da la cultura taliana d'oz: Ins instruescha las linguas da las minoritads nua che famiglias dal lieu las dovan. Er en Svizra vegn ins adina dapli adequada d'instruir rumantsch e talian nua ch'i dat diasporas da lezs linguatgs. Venderdi, ils 26 da favrer arranscha l'Institut da plurilinguitad da l'Universitad da Friburg in colloqui davart lingua e territori (barbla.etter@unifr.ch; v. La Quotidiana dals 6 da schaner). Là vegn ins a discutar quellas dumondas.

* E. P., **L'italiano in Svizzera: più lingua nazionale o più lingua di minoranza? Politiche linguistiche, iniziative in sua difesa e modalità d'insegnamento.** Universitad da Geneva (<http://archive-ouverte.unige.ch/unige:75639>) 2015.

** R. A., **Plädoyer für eine gelebte Mehrsprachigkeit.** Turitg (NZZ, ISBN 978-3-03823-910-9) 2014, p. 12.